

आकाशवाणी

Evening Dogri (NSD) Bulletin

25-12-2024

खबरां

- प्रधानमंत्री नरेंद्र मोदी होरें भारत दी पैहली नदी गी जोड़ने आहली केन-बेटवा परियोजना दा मध्य प्रदेश च नीह पत्थर रक्खेआ।
- केंद्री सहकारिता मंत्री अमित शाह होरें 10 जहार शा मते नमियां बनाई गेदियां बहुउद्देशीय प्राथमिक कृषि सहकारिता समितियां, डेयरी ते मच्छी पालन सहकारिता देश गी समर्पित कीते।
- देश च अंदरूनी सुरक्षा ते शांति सुनिश्चित करने च सी.आर.पी.एफ अहम भूमिका निभा'रदी ऐ, आखेआ केंद्री मंत्री अमित शाह होरें।
- राष्ट्रपति द्रौपदी मुर्मू होर 14 राज्यें ते केंद्र शासित प्रदेशें थमां 17 बच्चें गी प्रधानमंत्री राश्ट्रीय बाल पुरस्कार कन्नै सम्मानित करडन।
- लोक शिकायत ते पेंशन सरबन्धी राज्यमंत्री डॉ. जतिंद्र सिंह होरें अज्ज सुशासन दिवस दे मौके मुंडली सतह पर शासन गी मजबूती देने आस्तै विकसित पंचायत कर्मयोगी मुहिम दा शुभारम्भ कीता।
- ते उत्तराखंड दे भीमताल च राज्य परिवहन निगम दी 1 बस दे डूंगी खड्डे च जाई पौने करी 4 लोकें दी मौत होई।

<><><><><><>

PM-MP

प्रधानमंत्री नरेंद्र मोदी होरें आखेआ ऐ जे भारतीय जनता पार्टी ताई सुशासन शड़ा इक्क दिनें आहला कार्यक्रम नेई होइए उंदी सरकारै दी पंछान ऐ। होर दुइयें सरकारें कन्नै भाजपा दियें सरकारें दी बरोबरी दा आह्वान करदे होई श्री मोदी होरें आखेआ जे भाजपा दियें सरकारें सुशासन दे हर बिंदु ताई सख्त मेहनत कीती ऐ ते लोकें बक्खी समर्पित रेइयां न। प्रधानमंत्री होरें एहू गल्ल अज्ज दपैहरी मगरा मध्य प्रदेश दे खजुराहो च केन बेतवा राष्ट्रीय नदी गी जोड़ने आहली देसै दी पहली बड़ी महत्वै ते मते लक्ष्यें आहली परियोजना दा नींह पत्थर रखने परैंत अपने संबोधन च आक्खी। इस कार्यक्रम दा सरिस्ता साबका प्रधानमंत्री भारत रत्न सुरगीय अटल बिहारी बाजपेयी हुंदी 100मीं जयंती दे सरबंध्यै च कीते गेदा हा। उंदी जयंती गी हर बरै सुशासन दिवस दे तौरा पर माया जंदा ऐ। साबका प्रधानमंत्री अटल बिहारी बाजपेयी कन्नै जुड़ी दियें यादें गी सांझा करदे होई श्री मोदी होरें आखेआ जे अटल होर सुशासन ते बेहतर सेवां लेई म्हेशां प्रेरणा दे स्रोत रेय न। प्रधानमंत्री होरें देसै दी पैहली ओंकारेश्वर तैरने आहली सौर परियोजना दा उद्घाटन कीता ते 1100 अटल ग्राम सुशासन भवने दा भूमि पूजन बी कीता। श्री मोदी होरें अटल बिहारी बाजपेयी दे चेत्ते च इक डाक टिकट ते सिक्का बी जारी कीता।

<><><><><><>

Shah-PACS

केंद्री सहकारिता मंत्री अमित शाह होर अज्ज नमीं दिल्ली च 10 ज्हार शा बद्द नमियां बनाई गेदियां मते लक्ष्यें आहिलियें प्राथमिक कृषि डेरी ते मच्छी पालन सहकारी समितियों गी राष्ट्र दे नमित लाया। श्री सिंह होरें राष्ट्री सहकारिता सम्मेलन च नमियां खडेरी गेदियां सहकारिता समितियों गी पंजीकरण प्रमाण पत्र, रपे किसान क्रेडिट कार्ड ते माइक्रो यानि लौहके ए.टी.एम बी तकसीम कीते। इंदे कन्नै पंचैतें च दोआर कर्जे आहली क्रेडिट सहूलत उपलब्ध होग। माली समावेशन गी बढ़ावा थ्होग ते ग्राएं-मोहडें च रौहने आहले लोकें लेई स्कीमें थमां लाहू ठोआना सखल्ला होई जाग।

<><><><><><>

PM-Swamitva

प्रधानमंत्री नरेंद्र मोदी होर शुक्रवार 27 दिसंबर गी स्वामित्व स्कीम तैहत 50 लक्ख शा बद्द जदाद सरबन्धी कार्ड तक्सीम करंगन। श्री मोदी होर सकीमा दे लाहकारियें कन्नै गल्ल कत्थ बी करंगन। इस योजना तैहत ग्रांउ च रौहने आहले हर जदाद मालक गी औदी जदाद सरबन्धी अधिकारियें दा रिकार्ड सौंपेआ जाग। पंचैती राज मंत्रालय नै आखेआ ऐ जे स्वामित्व योजना जमीं मालकें गी अपनी जदाद दा मुद्रीकरण यानि नकदी च बदलियै दोआर कर्जे हासल करने च मदाद उपलब्ध ते जदाद कन्नै जुड़े दे लड़ाई झगड़े आहले मामलें च कमी औग। पंचैती राज सचिव विवेक भारद्वाज होरें आखेआ जे इस स्कीमै आस्तै ड्रोन रायं जांच जरिये तकरीबन 17 जहार ग्राएं मोहड़ें दा निरीक्षण कीता गेआ ऐ।

<><><><><><>

Shah-CRPF

केंद्री गृह मंत्री अमित शाह होरें अज्ज आखेआ जे सी.आर.पी.एफ नै नक्सलवाद कन्नै निब्वड़ने ते पूर्वोत्तर राज्यें सने जम्मू-कश्मीर च अमन-रमानदारी बहाल करने च सराहने जोग कम्म कीता ऐ। उनें गलाया जे बल देसै च अंदरूनी सुरक्षा ते शांति यकीनी बनाने च महत्वै आहली भूमिका निभा करदा ऐ। गृह मंत्री होरें एह गल्ल सीआरपीएफ मुख्यालय दा दौरा लांदे होई आक्खी। इस दौरान श्री सिंह होरें सीआरपीएफ दे महानिदेशक अनीश दयाल सिंह सने होर दुए अफसरें कन्नै बी मलाटी लाई। सीआरपीएफ प्रमुख होरें श्री सिंह गी बल दे शहीद जवानें दे परोआरें ताई लागू कीती जा'रदियां बक्ख-बक्ख कल्याणकारी स्कीमें बारै जानकारी दिती। गृह मंत्री होरें भाषाई एकता गी निगगर करने आस्तै बल दे रोज आहले कम्मकाज च हिंदी गी बढावा देने दे महत्वै पर जोर पाया। सैनिकें दी बेहतर सेहत आस्तै बद्द शा बद्द बाबजरे दे इस्तेमाल पर जोर देने दे कन्नो-कन्नो फौजियें गी आयुर्वेद थमां लाह हासल करने दा बी आह्वान कीता।

<><><><><><>

Sadaiv-atal Memorial

राष्ट्रपति द्रोपदी मुर्मू, उपराष्ट्रपति जगदीप धनखड़ ते प्रधानमंत्री नरेंद्र मोदी होरें अज्ज साबका प्रधानमंत्री अटल बिहारी बाजपेयी हुंदी 100मीं जयंती मौके दिल्ली च उंदी समाध सदैव अटल पर फुल्ल चाढ़िए भावें भरोची श्रद्धांजलि भेंट कीती। साबका राष्ट्रपति रामनाथ कोविंद, गृह मंत्री अमित शाह, लोकसभा अध्यक्ष ओम बिरला, आंध्र प्रदेश दे मुख्मन्त्री एन. चंद्रबाबू नायडू ते केंद्री मंत्री ते भारतीय जनता पार्टी दे प्रधान जे.पी नड्डा हुंदे सने नेकें लोकें बी अटल बिहारी बाजपेयी होरें गी श्रद्धांजलि भेंट कीती।

<><><><><><>

Rajnath-Vajpayee

रक्षा मंत्री राजनाथ सिंह होरें आखेआ ऐ जे साबका प्रधानमंत्री अटल बिजारी बजपेयी भारतीय सियासत दे महान विचारक हे, जिनें अपनी सारी जिंदगी देसै दी सेवा, मान-सम्मान ते विकास लेई समर्पित करी दिती। पत्रकारें कन्नै गल्ल करदे होई श्री सिंह होरें आखेआ जे बाजपेयी होरें भारतीय अर्थ बवस्था गी मजबूत करने च बड़ी महत्वै आहली भूमिका निभाई ही।

<><><><><><>

Prez. Bal Puraskar

राष्ट्रपति द्रोपदी मुर्मू होर कल नमीं दिल्ली च 7 श्रेणिएं तैहत शानदार उपलब्धिएं आस्तै 17 बच्चें गी प्रधानमंत्री राष्ट्रीय बाल पुरस्कार कन्नै सम्मानित करंबन। एह बच्चे 14 राज्यें ते केंद्र शासित प्रदेश दा ताल्लुक रखदे न। कला ते संस्कृति, वीरता, नवीनता, विज्ञान ते तकनीक, समाज सेवा, खेडू ते पर्यावरण दे खेत्तर च अद्भुत उपलब्धि आस्तै सरकार बच्चें गी एह

पुरस्कार दिंदी ऐ। प्रधानमंत्री नरेंद्र मोदी होर वीर बाल दिवस दे कार्यक्रम च हिस्सा लैगन। पूरे देश च इस सरबंध च कई प्रतियोगिता करवाई जा रदियां न जियां My Gov ते My Bharat Portal पर क्विज रचनात्मक लेखन, कहानी लेखन, पोस्टर प्रतियोगिता स्कूलें च करवाई जा रदियां न।

<><><><><><>

Rajnath Governance Day

साबका प्रधानमंत्री अटल बिहारी वाजपेयी हुंदी 100मीं जयंती दे मौके पर लोकभवन लखनऊ च सुशासन दिवस दे मौके पर कार्यक्रम दा आयोजन कीता। रक्षा मंत्री राजनाथ सिंह ते मुखमंत्री योगी आदित्यनाथ होरें वाजपेयी हुंदी प्रतिमा पर पुष्पंजली अर्पित कीती ते देश आस्तै उंदी सेवाएं गी चेत्ता कीता। कार्यक्रम गी संबोधित करदे होई रक्षा मंत्री राजनाथ सिंह होरें आखेआ जे अटल जी होरें भारत गी अच्छा शासन दित्ता जिसी देश अज्ज उंचाइयें पर ऐ। उंदे कार्यकाल च विकास दर 8.4 फीसदी रेआ जेड़ा गै आजाद भारत आस्तै ऐतिहासिक हा। मुखमंत्री योगी आदित्यनाथ होरें आखेआ जे अच्छे शासन आस्तै सुरक्षा दी भावना लाजमी ऐ। उनें आखेआ जे सुरक्षा दी भावना घरें थमां शुरू होंदी ऐ। रक्षामंत्री ते मुखमंत्री होरें लखनऊ च गोमती नदी दे किनारे कुटिया घाट पर अटल जी हुंदी प्रतिमा परा पर्दा गोआड़ेआ। मूर्तिकार अमरपाल सिंह होरेंगी बी इस मौके सम्मानित कीता गेआ।

<><><><><><>

Nadda-Christmas

क्रिसमस दे मौके बीजेपी राष्ट्रीय अध्यक्ष जे.पी नड्डा होरें नमीं दिल्ली दे Sacred heart Cathedral Church गए ते यीशू मसीह हुंदे अगो प्रार्थना कीती। इस मौके बीजेपी दे सांसद बांसुरी स्वराज ते कमलजीत सेहरावत, दिल्ली बीजेपी प्रधान विरेंद्र सचदेवा हुंदे कन्नै

हे। राश्ट्री राजधानी दिल्ली गी लब्बा'रदी ऐ। बक्ख-बक्ख गिरजाघरें च लोकें खरी मती गिनतरी च पुज्जियै खास प्रार्थना कीती। इस मौके गिरजाघरें गी बड़े शैल ते सनाकड़े ढंगे कन्नै सजाया गेआ ऐ।

<><><><><><>

Uttarakhand-Accident

उत्तराखंड च राज्य परिवहन निगम दी बस इक डूंगी खड्डे च पेई जाने करी 4 लोकें दी मौत होई गई ऐ। एह हादसा नैनीताल जिले दे भीमताल च पेश आया। पुलिस मूजब 28 यात्रुएं गी लेइए एह बस पिथोड़गढ़ थमां हल्दानी जारदी ही। सारे जख्मियें गी अस्पताल दाखल कराई दित्ता गेआ ऐ। हादसे दी थाहर पर राहत ते बचाव कम्म पूरा होई चुके दा ऐ। मुख्मन्त्री पुष्कर सिंह धामी होरें हादसे पर गहरा दुख जाहर कीता ऐ।

<><><><><><>

Cricket India-Aus.

क्रिकेट च कल बार्डर गवास्कर ट्रॉफी दे चौथे टेस्ट मैच च भारत ते आस्ट्रेलिया दा मकाबला मेलबर्न च होग। भारतीय समें मताबक एह मैच सबेरे 5 बजे शुरू होग। 5 मैचें दी श्रृंखला च दौनें टीमें 1-1 मैच जित्ते दा ऐ।

<><><><><><>

ICC-Ranking

भारत दे नंबर वन तेज गेंदबाज जसप्रीत बुमराह होरें आई.सी.सी मर्दे दे टेस्ट गेंदबाजी दी रैंकिंग च उच्चा मुकाम हासल कीता। उनें 904 रेटिंग अंक हासल कीते जेडे गै कुसा भारतीय गेंदबाज तरफा हासल अंके थमां मते न। एहदे शा पैहले एह रिकार्ड रविचंद्रन अश्विन दे नां हा। आईसीसी मूजब मेलबार्न टेस्ट मैच दोरान बुमराह गी इस रिकार्ड दे बी अगगे जाने दा मौका ऐ। ब्रिस्बेन च बुमराह दी गेंदबाजी शानदार रेई जेदे च उनें 94 रन्जें आस्तै 9 विकेटां हासल कीतियां हियां। इस कारण उनें 14 रेटिंग प्वाइंट्स हासल होए हे।

<><><><><><>

EPFO-Members

कर्मचारी प्रॉविडेंट फंड संगठन नै इस साल अक्तूबर दौरान कुल 13 लकख 41 ज्हार सदस्यें दा इजाफा दर्ज कीता ऐ। श्रम ते रोजगार मंत्रालय नै दस्सेआ ऐ जे एह बादा बदा रदे रोजगार दे मौकें ते कर्मचारिएं गी थोने आहले फायदें दे सरबंध च आई दी जागरूकता दा नतीजा ऐ। प्रावधानिक पे रोल डाटा दे मताबक ई.पी.एफ.ओ नै मौजूदा माली बरे च अक्तूबर च 7 लकख 50 ज्हार नमें सदस्यें गी शामिल कीता। इनें सदस्यें च 18 शा 21 बरे दे उम्री दे लोक ज्यादा ना। तकरीबन 12 लकख 90 ज्हार सदस्ये इक बारी परतिए ईपीएफओ च शामिल होए ना। मंत्रालयै नै दस्सेआ ऐ जे लैंगिक सर्वेक्षण मूजब तकरीबन 2 लकख 9 ज्हार महलां बी ईपीएफओ दी सदस्य बनि9यां न जेड़ा गै पिछले साल दे मकाबले 2.1-2 फीसदी मता ऐ।

<><><><><><>

Plane-Crash

कजाकिस्तान च इक जहाज क्रैश होने करी दर्जनें लोकें दी मौत होई गई ऐ। इस जहाज पर कुल 70 लोक सवार हे। अजरबैजान एयरलाइन्स दे इक जहान च उसलै अगग लग्गी जिसलै अक्ताऊ शहर दे कोल आपातकालीन स्थिति च जहाज गी तोआरने दी कोशिश कीती गई। अजरबैजान एयरलाइन्स दी फ्लाइट जे2-8243 अजरबैजानी दी राजधानी बाकू थमां रूस दे गोजनी जारदी ही। धुंध करी इस फ्लाइट दा रस्ता बदलना पेआ। जहाज च 62 जात्तरू ते 5 जहाज दे कर्मचारी मौजूद हे। बचने आहले 25 जनें शा 22 गी अस्पताल पजाया गेआ। सरकार नै इस दुर्घटना दा कारण पता लाने आस्तै जांच शुरू करी दिती ऐ।

<><><><><><>

Delhi-Pollution

राष्ट्रीय राजधानी दिल्ली च हवा दी गुणवत्ता अजे बी बड़ी माड़ी बनी दी ऐ। अज्ज दपैहरी 1 बजे औसत वायु गुणवत्ता सूचकांक एक्यूआई 337 दर्ज कीता गेआ। केंद्री प्रदूषण नियंत्रण

बोर्ड मूजब शहर दे किश इलाकें च एक्यूआई 350 दा आंकड़ा पार करी चुके दा ऐ। दिल्ली दे मुंदका स्टेशन च 405, नेहरू नगर च 375, बवाना च 374, पंजाबी बाग च 376, वजीरपुर च 390 ते अशोकर बिहार च 376 एक्यूआई दर्ज कीता गेआ ऐ।

<><><><><><>